

Pello Urzelai | EIBAR  
Hur Gorostiaga | BAIONA

**J**ose Luis Arrieta Zubimendi *Azkoiti* ETako kideak eta Felix Sarriegi errefuxiatuak azken agurra jaso zuten atzo, lehenak Eibar ondoko Kalamua mendiko magalean eta bigarrenak, jaioterrian, Alegian. Bi omenaldietan Olaia Kastresana Alacant aldean hildako ustezko ETako kidea eta «bidean eroritako gudari guztiak» gogoan izan zituzten. Azkoiti joan den asteko asteartean hil zen Tolosako (Okzitania) ospitalean bihotz gaixotasun baten ondorioz eta Felix Sarriegi bi egun beranduago Baionako ospitalean minbiziak jota.

Jose Luis Arrieta *Azkoiti*-ren errautsak Kalamuako magalean haizatu zituzten atzo eguerdi aldean, bostehun lagun bildu zituen omenezko ekitaldi hunkigarrian. Uzartza auzoan elkartu ondoren, ordu erdiko mendi ibilaldia egin zuten Kalamua mendiko tontorretik gertu zegoen zelai bateraino. Inguru horiek aukeratu zituen Jose Luis Arrietak berak lurrarekin bat egiteko. Gerra Zibileko trintxerak zeuden toki haietan biltzen zen Azkoiti burkideekin ETAn militatzen hasi zenean.

Oroimenez betetako omenaldia izan zen. Elgoibarko Pello Zaharra burkide eta lagunak «gizon zuzentzat» jo zuen Azkoiti. Iñigo Aranbarri idazle eta hildakoaren lehengusuak bost urteko haurra zeneko garaia ekarri zuen gogora, hain zuzen, Azkoitik giltzarri bat oparitu zionean eta amaren ahotik 'hanka egin du' entzun zuenean. «Etxera itzuli da, Kalamura, ez berak nahi zukeen moduan, baina ez etsaiek nahi zuten moduan, hilda. Ez da hil gure gogoa dagoen bitartean», nabarmendu zuen Aranbarrik.

Josu Urrutikoetxea Batasunako parlamentario eta Azkoiti-ren lagun eta burkide izandakoak haren «zintzotasuna», «irrimotasuna» eta «konpromiso militantea» goraipatu zituen, Arrieta-ren borroka bizitza eredu-garritzat joz. Gogoeta pare bat ere egin zuen Urrutikoetxeak. Batetik, duela hogeita hamar urte borrokan hasteko arrazoiak eta oraingoak berdinak direla esateko. «Herri honen eskubideak ukatzen zituzten eta orain ere ukatzen dituzte. Ez dugu guk bakarrik esaten, haiek ere argi eta garbi esaten ari dira», adierazi zuen. Euskal Herriak bere etorkizuna erabakitzearen kontrako jarrera «itsu» horrek, bestetik, Urrutikoetxearen ustez, «erakusten du bide onetik goazela». Are gehiago zehaztu zuen: «Ez gara une goxoak bizitzen ari, baina badakigu aurrera egiten halako momentuetan eta Azkoitik eta bidean eroritako beste kide batzuen eredua ja-



PABLO S. QUIZA

**KALAMUAKO MAGALEAN.** Eibar ondoko Kalamua mendiko tontorretik gertuko zelai batean, haritz gazte baten ondoan, haizatu zituzten Jose Luis Arrieta Zubimendi *Azkoiti*-ren errautsak.

## Joandakoen eredua gogoan

**AZKEN AGURRA.** Jose Luis Arrietak eta Felix Sarriegik azken agurra jaso zuten atzo senide eta lagunaren eskutik.



BOB EDME

**AZKEN AGURRA BAIONAN.** Jaioterrira itzultzeko bidaia hasi aurretik azken agurra eskaini zioten Baionan Felix Sarriegi errefuxiatu zenari.

rraituz bidea azken muturraino eramango dugu».

Bestalde, Eusebio Lasarte bertsolariak omenezko bertso bat kantatu zuen, Aitor Gorosabel kantariak kantu bat egin zuen, eta dantzari batek aureskua dantzatu. Azkenik, Azkoiti-ren hurbileko senideen aurrean (Ihintza eta Zigor seme-alabak, Zigorren neska-laguna, eta Mila eta Imanol anai-arrebak) senideek, koadrilako lagunak eta Eibarko ezker abertzaleko orde-

kariak haizatu zituzten errautsak ikurrina batez lagundurik.

### Baionan eta Alegian omenaldia

Baionako tanatorioan jaso zuen lehen omenaldia Felix Sarriegik, azken hamalau urteetan Baionan eta Ipar Euskal Herrian izan zituen lagunaren alde-tik.

Iheslarien kolektiboaren ize-nean hitza hartu zuen ordezkariak honelaa definitu zuen Felix Sarriegi: «Pertsona borrokalaria,

### JOSU URRUTIKOETXEA

Batasuneko parlamentarioa

**«Ez gara une goxoak bizitzen ari, baina badakigu aurrera egiten halakoetan»**

duin, umil eta koherente zen, inondik ere».

1987 urtean, bortxaz, Alegia-ko herria utzi behar izan zuela esan zuen, eta geroztik, Lapurdiko hiriburuan egin zuela bizi-modua azpimarratu zuten haren lagunak. Bizitza osoa borrokan jardun ondoren, azken garaia minbiziaren kontrako borrokan aritu zela oroitarazi zuten gisa berean. Txalaparta, auresku eta bertsolarien doinu-ondotik, *Eusko Gudariak* kantatuta erran zioten adio, «lagunen lagun ona eta apaltasunean langile» izandakoari.

Baionako ekitaldia bukatu eta mugarantz eraman zuten gorpua, auto karabanak segiturik. Eguerdian erraustu eta arratsean egin zioten omenaldia, sortzen ikusi zuen Alegia herrian.

Alegian Sabin Torrek hitz egin zuen Amnistiaren Aldeko Batzordeen izenean. «Zuen eredua jarraituz zin egiten dizuegu gogoz eta indarrez eutsiko diogula zuek hasitako bideari», esan zuen, Olaia Kastresana ere gogoan zuela.

### EUSKAL PRESOK

**Tortura eta preso- en egoera salatze-ko giza kateak eginen dira etzi**

Erredakzioa | DONOSTIA

Tortura eta euskal preso- en egoera salatze-ko giza kateak antolatu dituzte Euskal Herriko hainbat errepidetan etzirako Senideak-Gureak-ek, Koordinaketak eta Amnistiaren Aldeko Batzordeek.

Azken urteetan egin moduan, oportetara doazen herritarren joan-etorria baliatuz, euskal preso- en egoera plazaratzeko giza kateak eginen dira larunbatean, Euskal Herriko hainbat errepidetan, 12:00etatik 13:30 bitartean. Aurten preso- en Euskal Herriratzea eskatzeaz gain, torturaren erabilera ere salatuko dute. Aurten- go lehenengo sehilabete-koan 53 tortura salaketa egin direla aintzat hartuz, giza kateko parte hartzaileek *Tortura stop* leloa azalduko duen kartelak eramanen dituzte.

### Parte hartzeko deia

Nafarroan, Araban, Bizkaian, Gipuzkoan, eta Lapurdin eginen dira ibilbideak. Nafarroakoa Altsasu inguruan izanen da.

Araban bi gunetan eginen da. Lehena, N-1ean. Argomaizetik Garaioara, 13 kilometroz. Bigarrena, N-622 zonaldean antolatu da, Gasteiz eta Apodaka artean.

Gipuzkoan N-1 errepi- dean eginen dira giza kateak, Santiagoko zubian hasi eta Idiazabalen Etxegarate mendatea hasten den guneraino. 56 kilometro inguru hartuko dira.

Bizkaian N-626 errepi- dean eginen da. Katea Basauriko bidegurutzean hasiko da, eta Arrigorriagan bukatu. Lau kilometro katea eginen da.

Lapurdi kostalde guztia estaliko du kateak, 33 kilometroetan, Baionatik Hendaiara. Hitzorduak 11:15 irian finkatu dituzte N10 bide nagusian. Hala nola Miarritzeko Parmen, Bidarteko Hondartza Handian eta Tupinan, Donibane Lohizuneko geltokian, Urruñako gasolindegian eta Florenia parkean, eta Hendaiako geltokian izanen dira bilgune nagusiak.